



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI DOM

Broj: 01-011-767/02

Sarajevo, 16. jula 2002.

Z A P I S N I K

sa 29. sjednice Predstavničkog doma Parlamentarne skupštine Bosne i Hercegovine,
održane 16. jula 2002. godine

Sjednica je počela s radom u 11,20 sati. Prisustvovalo je 40 poslanika. Odsustvovali su Mustafa Cuplov i Dušan Stokić.

Sjednici su prisustvovali predsjedavajući Predsjedništva BiH Beriz Belkić, predsjedavajući Vijeća ministara Dragan Mikerević, ministri u Vijeću ministara Zlatko Lagumdžija, Ante Domazet, Svetozar Mihajlović, Azra Hadžiahmetović i Krešimir Zubak, te zamjenici ministara Gordana Ković, Kadrija Haračić – Šabić i Vladislav Vladičić.

Iz međunarodnih organizacija prisustvovali su J.P. Hoteldahl – ispred OHR-a, predstavnici Evropske unije, američke i rumunske ambasade.

Predsjedavajući Mariofil Ljubić dao je uvodne napomene o prijedlogu dnevnog reda koji je na sjednici Proširenog kolegija nešto izmijenjen u odnosu na onaj koji su poslanici dobili u pozivu za sjednicu.

U diskusiji povodom prijedloga dnevnog reda učestvovali su:

Miro Grabovac – Titan – osporio da se po članu 105. Poslovnika razmatra Prijedlog zakona o izmjenama i dopunama Zakona o carinskoj tarifi sa Carinskom tarifom. Predložio da se skine s dnevnog reda.

Miloš Jovanović – prigovorio što i na ovoj sjednici ima zahtjeva za razmatranje zakona po hitnom postupku po članu 105., što je nazvao ponižavanjem o pocjenjivanjem ovog doma.

Omer Filipović – iznio mišljenje da bi Dom mogao prihvatiti zahtjev da po hitnom postupku donese Zakon o izmjenama i dopunama Zakona o carinskoj tarifi, jer je on u skoro istovjetnom tekstu u ovom domu usvojen, ali ga tada nije usvojio Dom naroda.

Obrazloženje zahtjeva za razmatranje po hitnom postupku Prijedloga zakona o izmjenama i dopunama Zakona o carinskoj tarifi podnijela je ministar Azra Hadžiahmetović.

Dalje su u diskusiji o dnevnom redu učestvovali Miro Grabovac – Titan i Osman Brka. Potom se Dom izjasnio o prijedlogu Mire Grabovca da se iz dnevnog reda isključi zahtjev za razmatranje Prijedloga zakona o carinskoj tarifi.

Od 37 prisutnih ZA je glasalo 12, protiv 14, suzdržalo se 11 poslanika. Prema tome, prijedlog nije usvojen.

Dom je jednoglasno usvojio prijedlog da se u dnevni red uvrsti Zahtjev Vijeća ministara da se po članu 104. Poslovnika razmatra Prijedlog zakona o kretanju i boravku stranaca i azilu.

Dom se izjasnio i o cjelovitom prijedlogu dnevnog reda.

Sa 34 glasa ZA i 3 suzdržana, za 29. sjednicu usvojen je sljedeći

D N E V N I R E D:

1. Zapisnik sa 28. sjednice Predstavničkog doma,
2. Poslanička pitanja i odgovori,
3. Izvještaj o izvršenju Budžeta institucija BiH i međunarodnih obaveza BiH za 2001. godinu i Izvještaj o izvršenju Budžeta institucija BiH i međunarodnih obaveza BiH za period I – III budžetske 2002. godine,
4. Izvještaj Komisije Kolegija o nastojanju za postizanje saglasnosti o amandanimama poslanika Seada Avdića na Prijedlog zakona o društvu Crvenog krsta/križa Bosne i Hercegovine,
5. Izvještaj Komisije Kolegija o nastojanju za postizanje saglasnosti o Prijedlogu zakona o koncesijama Bosne i Hercegovine,
6. Izvještaj Komisije Kolegija o nastojanju za postizanje saglasnosti o amandmanu poslanika Seada Avdića na Zakon o praznicima Bosne i Hercegovine,
7. Izvještaj Komisije Kolegija o nastojanju za postizanje saglasnosti o Protokolu o osnivanju i funkcionisanju kulturnih centara između Vijeća ministara BiH i Vlade Republike Turske,
8. Zahtjev Vijeća ministara za razmatranje Prijedloga zakona o osnovama Javnog radio-televizijskog sistema i o Javnom radio-televizijskom servisu Bosne i Hercegovine po hitnom postupku (član 105. Poslovnika),
9. Zahtjev Vijeća ministara za razmatranje Prijedloga zakona o Visokom sudskom i tužilačkom savjetu Bosne i Hercegovine po hitnom postupku (član 105. Poslovnika),
10. Zahtjev Vijeća ministara za razmatranje Prijedloga zakona o izmjenama i dopunama Zakona o carinskoj tarifi Bosne i Hercegovine, sa carinskom traifom, po hitnom postupku, u skladu s članom 105. Poslovnika,
11. Prijedlog zakona o osiguranju depozita Bosne i Hercegovine (drugo čitanje),
12. Prijedlog zakona o izmjenama i dopunama Zakona o vazduhoplovstvu Bosne i Hercegovine (prvo čitanje),
13. Prijedlog zakona o veterinarstvu u Bosni i Hercegovini (prvo čitanje),
14. Prijedlog zakona o izmjenama i dopunama Zakona o Centralnoj banci Bosne i Hercegovine (prvo čitanje),
15. Prijedlog zakona o ravnopravnosti i jednakosti polova u Bosni i Hercegovini (prvo čitanje),
16. Prijedlog zakona o odlikovanjima Bosne i Hercegovine (prvo čitanje),
17. Prijedlog rezolucije o mladima u BiH (predlagači poslanici Predstavničkog doma),
18. Prijedlog rezolucije (podnosilac Sead Buturović),
19. Davanje saglasnosti za ratifikaciju:
 - a) Ugovora o trgovini tekstilnim proizvodima između Evropske zajednice i Bosne i Hercegovine,
 - b) Sporazuma o razvojnom kreditu (Kredit za prilagođavanje poslovnog ambijenta) između Bosne i Hercegovine i Međunarodne asocijacije za razvoj,
20. Prijedlog zaključka za formiranje Privremene komisije za pripremu izmjena Poslovnika Predstavničkog doma i

21. Zahtjev Vijeća ministara da se po hitnom postupku usvoji Prijedlog zakona o kretanju i boravku stranaca i azilu.

Ad. – 1: Zapisnik sa 28. sjednice Predstavničkog doma

Na zapisnik nije bilo primjedbi. Dom je zapisnik sa 28. sjednice usvojio sa 36 glasova ZA i jednim suzdržanim.

Ad. – 2: Poslanička pitanja i odgovori

Poslanička pitanja postavili su poslanici kako slijedi:

Sead Avdić:

1. Zatražio da Vijeće ministara hitno dostavi cjelovitu informaciju o uspostavi i vođenju Projekta CIPS-a, sa svim relevantnim podacima, kao što su:

- cijena koštanja sa carinama, porezima, obukom, lokalnom radnom snagom itd.,
- načinom raspodjele posla od strane SIMENS-a i ugovorima sa proizvođačima softvera,
- primanjima direktora projekta i eksperata projekta itd.,
- raspisivanje tendera.....

2. U vezi s izjavom Jadranka Prilića, da je njegova supruga vlasnik firme Optima iz Mostara koja radi dio posla iz projekta CIPS-a, zatražio od Vijeća ministara sljedeće:

- da se hitno očituje doministar Prilić o istinitosti i navodima pisanja medija o njegovoj izjavi,
- da se Vijeće ministara isto tako odredi o ovom istupu svoga člana,
- za slučaj istinitosti navoda u pisanju medija o izjavi Jadranka Prilića, SDP traži od ministra Prilića da kao izraz moralne i političke odgovornosti ponudi ostavku Vijeću ministara i Predstavničkom domu Parlamentarne skupštine BiH.

Osman Brka:

Pokrenuo inicijativu da Vijeće ministara BiH pripremi i stavi u proceduru zakone kojim bi se poslanici Parlamentarne skupštine BiH, izabrani 1990. i kasnije na višestranačkim izborima, mogli penzionisati pod određenim uslovima koje zakon predviđi.

Senad Šarganović:

1. U vezi sa grupom građana iz Beograda koji su bili krenuli na komemoraciju u Srebrenicu, a potom vraćeni od strane policije Republike Srpske, zatražio informacije:

- a) od Vijeća ministara BiH – koje granice slobode kretanja kroz Bosnu i Hercegovinu imaju građani Srbije i Crne Gore?
- b) od predsjednika Republike Srpske – koje će mjere poduzeti za bezbjedno i slobodno kretanje građana Srbije i Crne Gore po Republici Srpskoj nakon incidenta koji je izazvala policija Republike Srpske,
- c) od Vlade Republike Srpske – kojim bezbjednosnim podacima je raspolagala da bi se grupi od 37 građana Beograda zabranio ulazak u Bosnu i Hercegovinu i Srebrenicu, posebno što su većinu grupe činile žene i
- d) Međunarodnoj policiji IPTF – šta su uočili prilikom asistencije u sporu ove grupe građana Beograda i policije Republike Srpske.

2. Kada će na graničnom prijelazu Užljebić biti obezbijedena električna energija, obzirom na blizinu dalekovoda?

3. Kada će biti završena izgradnja graničnog prijelaza Izačić?

4. Šta je sa investicijom obnove Unske pruge koja je obezbijedena od strane Japanske vlade, obzirom na veliki značaj i profitabilnost te pruge?

5. Kada će u zakonsku proceduru biti pušten Zakon o obrazovanju na nivou BiH, u skladu sa zajedničkim i usaglašenim prijedlogom entiteta FBiH i RS, a koji je urađen na prijedlog federalnog Ministarstva obrazovanja u skladu sa Bolonjskom deklaracijom?

Branislava Ferzanović:

Ko je u ime koga dao inostranoj firmi posao štampanja izbornih listića, iako postoje sve tehničke pretpostavke za obavljanje ovog posla u štamparijama Bosne i Hercegovine?

Damir Mašić:

Da li je istina da je u optičaju novčanica od 50 KM sa likom najtraženijeg haškog optuženika Radovana Karadžića? Ako jeste, ko je odgovoran za to?

Marko Amidžić:

1. Sugerisao da političke partije ne stavljaju na Dom pitanja koja žele raspraviti, već da to definiše poslanik određene partije kao svoje vlastito poslaničko pitanje.

2. Kratkom šutnjom je izrazio protest zbog toga što još uvijek nije dobio odgovor od Vijeća ministara na ranije postavljeno poslaničko pitanje.

Miloš Jovanović:

Prigovorio što još uvijek nije dobio odgovor na četiri pitanja koja je na prethodnim sjednicama postavio, te je zapitao - da li ima neki rok u kojem se mora odgovoriti na poslanička pitanja?

Željko Bilbija:

Da li Vijeće ministara radi šta na pripremi, odnosno potpisivanju sporazuma sa zemljama koje okružuju BiH, npr. s Jugoslavijom?

Na pitanje usmeno odgovorio ministar civilnih poslova i komunikacija Svetozar Mihajlović.

Violeta Kamberović:

Kolegiju i predsjedavajućim klubova poslanika postavila pitanje:

Do kada će pojedini poslanici napuštati sjednice prije završetka bez obrazloženja?

Ad. - 3: Izvještaj o izvršenju Budžeta institucija BiH i međunarodnih obaveza BiH za 2001. godinu i Izvještaj o izvršenju Budžeta institucija BiH i međunarodnih obaveza BiH za period I - III budžetske 2002. godine

U okviru ove tačke diskutovali su Ramiz Vilić, Hilmo Neimarlija, Emina Zaćiragić, Mirko Mijatović, Boro Bjelobrk, Ljubomir Kovačević, Salih Kulenović, Abdurahman Malkić i Senad Šarganović.

U ime podnosioca Izvještaja govorio je ministar za trezor institucija BiH Ante Domazet i odgovorio na pitanja iz diskusije.

Poslije diskusije Dom je, sa 26 glasova ZA i 6 protiv usvojio Izvještaj o izvršenju Budžeta institucija BiH i međunarodnih obaveza BiH za 2001. godinu.

Izvještaj o izvršenju Budžeta institucija BiH i međunarodnih obaveza za period I - III budžetske 2002. godine Dom je primio k znanju.

Ad. - 4: Izvještaj Komisije Kolegija o nastojanju za postizanje saglasnosti o amandmanima poslanika Seada Avdića na Prijedlog zakona o društvu Crvenog krsta/križa Bosne i Hercegovine

Kako u Komisiji Kolegija nije postignuta saglasnost o amandmanima Seada Avdića, izvršeno je glasanje u drugom krugu.

Od 34 pristuna ZA prvi amandman glasala su 23 poslanika, 10 je glasalo protiv, jedan se suzdržao. Po entitetima, iz Republike Srpske protiv je glasalo 10 poslanika, te, prema tome, amandman nije usvojen.

Također nije usvojen ni drugi amandman Seada Avdića. ZA su glasala 24, protiv 10, suzdržao se jedan poslanik. Po entitetima, iz Republike Srpske 10 poslanika glasalo je protiv.

Pošto je izvršeno glasanje o amandmanima u drugom krugu, Dom se izjasnio o Prijedlogu zakona o društvu Crvenog krsta/križa Bosne i Hercegovine.

Od 35 prisutnih 11 poslanika glasalo je ZA; 21 protiv, jedan se suzdržao. Prema tome, Prijedlog zakona nije dobio većinu prisutnih.

Nakon glasanja Sead Avdić je u kratkoj diskusiji, između ostalog, rekao da su se trudili kako bi postigli politički konsenzus oko ovog zakona koji nije strateškog karaktera. Naglasio je da su se potrudili da u vezi s amandmanima usaglaise stavove Republike Srpske i Federacije, kao i entitetskih crvenih krstova koji su podržali amandmane, ali da ni to nije bilo dovoljno za njihovo usvajanje.

Osman Brka je odgovorio da Sead Avdić ovo što je rekao treba da kaže Alijansi, a ne Parlamentu.

Ovim je zaključena rasprava po 4. tački dnevnog reda.

Ad. - 5: Izvještaj Komisije Kolegija o nastojanju za postizanje saglasnosti o Prijedlogu zakona o koncesijama Bosne i Hercegovine

Predsjedavajući Mariofil Ljubić je podsjetio poslanike da u Komisiji Kolegija nije postignuta saglasnost o Prijedlogu zakona o koncesijama.

Zamjenik predsjedavajućeg Željko Mirjanić rekao je da Zakon o koncesijama treba donijeti radi ekonomskih reformi i ekonomskog oporavka Bosne i Hercegovine, Republike Srpske i Federacije BiH. Izrazio je žaljenje što se Kolegij nije usaglasio i naglasio da je on pokušao da se postigne saglasnost na taj način što je predložio neka rješenja koja su išla ka onome tekstu koji je usvojio Dom naroda, što bi značilo da zakon danas bude konačno usvojen. Postoji i drugi put – da se zakon usvoji u predloženom tekstu, a da se formira komisija za usaglašavanje jedinstvenog teksta, što je duži put, rekao je, između ostalog, Željko Mirjanić.

U ime predlagača zakona govorila je ministar Azra Hadžiahmetović.

Poslije izlaganja g. Hadžiahmetović, predsjedavajući je na glasanje dao Prijedlog zakona u tekstu koji je predložilo Vijeće ministara.

Prijedlog zakona usvojen je sa 34 glasa ZA.

Kako je u Domu naroda ovaj zakon usvojen sa određenim amandmanima, Dom je imenovao Omera Filipovića, Željka Bilbiju i Marka Amidžića za članove zajedničke komisije radi postizanja sporazuma o jedinstvenom tekstu Zakona o koncesijama Bosne i Hercegovine.

Ad. – 6: Izvještaj Komisije Kolegija o nastojanju za postizanje saglasnosti o amandmanu poslanika Seada Avdića na Zakon o praznicima Bosne i Hercegovine

U Kolegiju nije postignuta saglasnost o amandmanima Seada Avdića.

Ni u drugom krugu glasanja amandmani nisu dobili podršku. Od 33 pristunih 22 poslanika su glasala ZA, 8 protiv, jedan se suzdržao. Po entitetima, iz Republike Srpske protiv je glasalo 10 poslanika.

Potom se Dom izjasnio o Prijedlogu zakona.

ZA Prijedlog je glasalo 6, protiv 22 poslanika. Prema tome, Dom nije usvojio Prijedlog zakona o praznicima Bosne i Hercegovine.

Ad. – 7: Izvještaj Komisije Kolegija o nastojanju za postizanje saglasnosti o Protokolu o osnivanju i funkcionisanju kulturnih centara između Vijeća ministara BiH i Vlade Republike Turske

O Protokolu u Kolegiju nije postignuta saglasnost.

U drugom krugu glasanja, od 34 prisutna 22 poslanika glasala su ZA, 10 protiv, 2 suzdržana. Po entitetima, iz Republike Srpske 10 poslanika glasalo je protiv. Prema tome, Dom nije dao saglasnost za ratifikaciju Protokola o osnivanju i funkcionisanju kulturnih centara između Vijeća ministara BiH i Vlade Republike Turske.

Poslanik Hilmo Neimarlija, u svojoj diskusiji povodom ponovnog neprihvatanja Protokola, između ostalog, rekao je da je to i zbog toga što Vijeće ministara nije dalo valjane informacije u vezi s istim. Apelovao je na Vijeće ministara, ukoliko će se ponovo Protokol slati na raspravu, da pripremi odgovarajuću informaciju i osigura valjane razloge kako ne bi ponovo dolazili u ovakvu situaciju.

Ad. – 8: Zahtjev Vijeća ministara za razmatranje Prijedloga zakona o osnovama Javnog radio-televizijskog sistema i o Javnom radio-televizijskom servisu Bosne i Hercegovine po hitnom postupku (član 105. Poslovnika)

Zahtjev Vijeća ministara da se Prijedlog zakona o osnovama Javnog radio-televizijskog sistema i o Javnom radio-televizijskom servisu Bosne i Hercegovine donese po hitnom postupku u skladu s članom 105. Poslovnika, nije dobio entitetsku većinu. Od 34 prisutna ZA su glasala 23, protiv 10, jedan suzdržan. Po entitetima, iz Federacije je ZA glasao 21, iz Republike Srpske 3 poslanika.

Članovi Kolegija su odmah proveli postupak usaglašavanja, pa je predsjedavajući obavijestio da nema saglasnosti.

Poslanik Boro Bjelobrk je zatražio detaljno obrazloženje zašto u Kolegiju nema saglasnosti. Naglasio je da Kolegij nema pravo da donosi interno neke odluke, bez obavještavanja Doma.

Predsjedavajući Ljubić je odgovorio da će se onda provesti ponovni postupak i napisati izvještaj.

Poslanik Damir Mašić se obratio javnosti s konstatacijom da je ovo sramota i treba svi sutra da objave ko je za to da idemo smjernicama Mape puta, ko nije za to. Oni koji nisu za to očigledno neće da daju razloge zašto nisu, rekao je, između ostalog, Damir Mašić.

Na diskusiju Damira Mašića odgovorio je Mirko Mijatović. Između ostalog, rekao je da je bio pripremio pitanje za gospodina Pedi Eždauna u vezi s ovim zakonom, ali da mu vrijeme

nije dozvolilo da ga postavi. Naglasio je da on, a i većina poslanika iz Republike Srpske nisu glasali za donošenje zakona po hitnom postupku iz razloga što upravo u ovom prijedlogu nisu ugrađene smjernice i direktive Evropske unije. Rekao je, između ostalog, da on podržava donošenje zakona i da je to potreba, ali da njegova rješenja ne mogu biti u suprotnosti sa smjericama Evropske unije i na štetu entitetskih televizijskih servisa.

Dalje su diskutovali:

- Dragi Stanimirović: između ostalog, rekao je da je jedino rješenje da Dom usvoji zakon kojeg je proglasio Visoki predstavnik, da bi se kasnije mogle vršiti eventualne izmjene. Napomenuo je da je slična argumentacija korištena i prilikom svih ostalih zakona koji su godinama bili predmet opstrukcije i blokada u ovoj skupštini od prilike od istih poslanika i od istih političkih partija. "Ukoliko ovaj zakon danas ne bude u proceduri, ukoliko ne bude usvojen, BiH je talac vaše promašene politike koja se zasniva na tome da onemogućite pristup izradi studije izvodljivosti i izradi sporazuma o stabilizaciji i pristupanju, odnosno približavanju Bosne i Hercegovine Evropskoj uniji", rekao je, između ostalog, Dragi Stanimirović.

- Osman Brka: rekao je da je potpisnik ovog prijedloga zakona gospodin Mikerević, predsjedavajući Vijeća ministara, pa je zamolio Vijeće ministara da ne dolazi na sjednice, a da članovi Alijanse glasaju protiv prijedloga koje oni predlože. "Molim vas, gospodo, ako se ne možete složiti, podnesite ostavku, jer ne funkcionišete", rekao je, između ostalog, Osman Brka.

- Mirko Banjac: prigovorio je da se u diskusijama iznose neistine, te napomenuo da Poslovnik ne poznaje proceduru koja se hoće kao praksa nametnuti Parlamentu. Zapitao je predlagачe zašto to rade i je li misle da na taj način uvode red u Bosni i Hercegovini. Zapitao je dalje – gdje piše da Visoki predstavnik može da donosi zakone, i, ako piše, zašto ih onda uopšte donosi Parlament. "Visoki predstavnik može da donosi odluke sa zakonskom snagom, koje su na snazi sve dok Parlament ne usvoji nešto što remeti implementaciju Mirovnog sporazuma, i ja to pozdravljam, ali, to nije ova situacija", rekao je, između ostalog Mirko Banjac i upozorio da se zloupotrebljava član 105. Poslovnika jer nigdje ne piše da se zakoni moraju usvojiti bez izmjena da bi se kasnije moglo intervenisati.

Ad. – 9: Zahtjev Vijeća ministara za razmatranje Prijedloga zakona o Visokom sudskom i tužilačkom savjetu Bosne i Hercegovine po hitnom postupku (član 105. Poslovnika)

U okviru ove tačke dnevnog reda diskutovali su:

- Emina Zaćiragić: odgovorila je na prethodnu diskusiju Mirka Banjca. Između ostalog, kazala je da smo svi saglasni da ovaj parlament po Ustavu i Poslovniku ima zadatak prvenstveno da donose zakone koji će uobličiti pravni poredak Bosne i Hercegovine. Bosna i Hercegovina je prenijela dio suvereniteta na međunarodnu zajednicu, a to je Visoki predstavnik koji ima dio suvereniteta i ovog doma i ima pravo da donosi zakone koje Dom neće ili ne može da donese. Zakoni Visokog predstavnika se ne mogu mijenjati. Može se predložiti novi i donijeti takav zakon. Visoki predstavnik nam nudi da nam vrati suverenitet, da te zakone usvojimo, pa da ih prilagođavamo evropskim standardima, da ih mijenjamo – kazala je, pored ostalog, Emina Zaćiragić. Predložila je da Dom usvoji zahtjev Vijeća ministara i da ovaj zakon donese po hitnom postupku.

- Mirko Banjac: rekao je da ne želi polemisati sa Eminom Zaćiragić. Od Kolegija je zatražio da i ovom domu i javnosti kaže gdje piše ovo što je g-đa Zaćiragić izjavila, da je suverenitet ovog doma i ove zemlje prenesen na instituciju Visokog predstavnika.

- Miloš Jovanović: rekao je da on i klub kojem pripada ne vrše opstrukciju. Naglasio je da ovaj zakon, kao i prethodni, treba razmotriti u redovnoj proceduri pa je na Prijedlog zakona iznio i konkretne primjedbe.

Prilikom glasanja zahtjev Vijeća ministara nije dobio entitetsku većinu. Od 34 poslanika koji su glasali, ZA su glasala 22, 8 je glasalo protiv. Po entitetima, iz Federacije BiH ZA je glasalo 20, iz Republike Srpske 4 poslanika.

Ad. – 10: Zahtjev Vijeća ministara za razmatranje Prijedloga zakona o izmjenama i dopunama Zakona o carinskoj tarifi Bosne i Hercegovine, sa Carinskom tarifom, po hitnom postupku, u skladu s članom 105. Poslovnika

Željko Bilbija je u diskusiji podsjetio da je Dom ranije usvojio Prijedlog zakona koji je predložilo Vijeće ministara, a da su poslanici novi prijedlog dobili prošle sedmice. Naglasio je da su poslanici jutros dobili nove amandmane, te da on za ovaj prijedlog ne može glasati, tim prije što nije ni ponio Prijedlog zakona i ne može vidjeti na šta se amandmani odnose.

Poslije diskusije poslanika Bilbije Prijedlog zakona obrazložila je ministar Azra Hadžiahmetović. Potom se Dom o zahtjevu Vijeća ministara izjasnio.

Od 34 prisutna ZA je glasao 21 poslanik, 6 je glasalo protiv, a 6 se suzdržalo. Po entitetima, iz RS ZA su glasala 2, iz FBiH 19 poslanika. Prema tome, zahtjev Vijeća ministara nije usvojen.

Ad. – 11: Prijedlog zakona o osiguranju depozita Bosne i Hercegovine (drugo čitanje)

Obrazloženje Prijedloga zakona podnijela je Gordana Ković, zamjenik ministra za trezor institucija Bosne i Hercegovine. Potom se Dom izjasnio o amandmanima koje je na Prijedlog zakona podnio poslanik Tihomir Gligorić u ime Kluba poslanika PDP-SNS-SNSD-SPRS.

Dom je usvojio amandman na naziv zakona koji je podržao i predlagач zakona. Amandmani na član 18. i 19. nisu usvojeni. ZA je glasalo 12, protiv 20, suzdržala se 2 poslanika.

Predstavnički dom je usvojio Zakon o osiguranju depozita u bankama Bosne i Hercegovine. ZA zakon glasala su 33 poslanika, a jedan se suzdržao od glasanja.

Ad. – 12: Prijedlog zakona o izmjenama i dopunama Zakona o vazduhoplovstvu Bosne i Hercegovine (prvo čitanje)

O Prijedlogu zakona nije bilo diskusije.

Dom je u prvom čitanju jednoglasno usvojio Prijedlog zakona o izmjenama i dopunama Zakona o vazduhoplovstvu Bosne i Hercegovine.

Ad. – 13: Prijedlog zakona o veterinarstvu u Bosni i Hercegovini (prvo čitanje)

O Prijedlogu zakona diskutovao je Salih Kulenović. Potom je Dom, također jednoglasno, usvojio Prijedlog zakona o veterinarstvu u Bosni i Hercegovini u prvom čitanju.

Ad. – 14: Prijedlog zakona o izmjenama i dopunama Zakona o Centralnoj banci Bosne i Hercegovine (prvo čitanje)

Dom je, bez diskusije, jednoglasno usvojio Prijedlog zakona o izmjenama i dopunama Zakona o Centralnoj banci Bosne i Hercegovine u prvom čitanju.

Ad. – 15: Prijedlog zakona o ravnopravnosti i jednakosti polova u Bosni i Hercegovini (prvo čitanje)

Izvršaj nadležne komisije obrazložila je Violeta Kamberović, predsjedavajući Komisije za ravnopravnost polova.

Poslanik Željko Bilbija obavijestio je Dom da je u ime Kluba podnio amandmane na Prijedlog zakona, ali da kao predlagač nije pozvan na sjednicu Komisije kada je razmatrala Prijedlog zakona. Naglasio je da sjednici nije prisustvovao ni član Komisije iz Republike Srpske jer nije blagovremeno obaviješten. Iz toga razloga principijelno neće podržati predloženi zakon, rekao je, između ostalog, Željko Bilbija.

Predsjedavajući Komisije Violeta Kamberović odgovorila je da su članovi Komisije na vrijeme dobili poziv za sjednicu, ali da postoji pravilo kod pojedinih članova Komisije da se ne odazivaju pozivima za sjednice.

Poslije diskusije Dom je u prvom čitanju usvojio Prijedlog zakona o ravnopravnosti i jednakosti polova u Bosni i Hercegovini. ZA Prijedlog je glasalo 25, a uzdržala se 3 poslanika.

Ad. – 16: Prijedlog zakona o odlikovanjima Bosne i Hercegovine (prvo čitanje)

O Prijedlogu zakona diskutovao je Abdurahman Malkić.

Sa 23 glasa ZA i 2 suzdržana Dom je usvojio Prijedlog zakona o odlikovanjima Bosne i Hercegovine u prvom čitanju.

Ad. – 17: Prijedlog rezolucije o mladima BiH (predlagači poslanici Predstavničkog doma)

U ime predlagača Prijedloga rezolucije obrazloženje je podnio Dragi Stanimirović. U diskusiji su učestvovali Sead Buturović i Marko Amidžić.

Poslije diskusije Dom je jednoglasno (sa 23 prisutna poslanika) usvojio Rezoluciju o mladima u Bosni i Hercegovini.

Ad. – 18: Prijedlog rezolucije (podnosilac Sead Buturović)

Kratko obrazloženje podnio je Sead Buturović.

Dom je jednoglasno usvojio Rezoluciju o garantovanju ljudskih prava građanima Bosne i Hercegovine.

Ad. – 19: Davanje saglasnosti za ratifikaciju:

- a) Ugovora o trgovini tekstilnim proizvodima između Evropske zajednice i Bosne i Hercegovine,
- b) Sporazuma o razvojnom kreditu (Kredit za prilagođavanje poslovnog ambijenta) između Bosne i Hercegovine i Međunarodne asocijacije za razvoj

Marko Amidžić, predsjedavajući Komisije za vanjske poslove, obrazložio je mišljenje Komisije, a potom je u ime Vijeća ministara govorila Azra Hadžiahmetović.

Dom je jednoglasno dao saglasnost za ratifikaciju:

- a) Ugovora o trgovini tekstilnim proizvodima između Evropske zajednice i Bosne i Hercegovine,
- b) Sporazuma o razvojnom kreditu (Kredit za prilagođavanje poslovnog ambijenta) između Bosne i Hercegovine i Međunarodne asocijacije za razvoj.

Ad. – 20: Prijedlog zaključka za formiranje Privremene komisije za pripremu izmjena Poslovnika Predstavničkog doma

Uvodne napomene dao je predsjedavajući Doma Mariofil Ljubić.

U diskusiji je učestvovao Marko Amidžić.

Dom je jednoglasno usvojio zaključak o formiranju Privremene komisije za pripremu prijedloga odluke o izmjenama i dopunama Poslovnika Predstavničkog doma. Za članove Komisije imenovani su: Sead Avdić, Abdurahman Malkić, Emina Zaćiragić, Miloš Jovanović, Mirko Banjac, Miro Grabovac i Halil Mehtić.

Ad. – 21: Zahtjev Vijeća ministara da se po hitnom postupku usvoji Prijedlog zakona o kretanju i boravku stranaca i azilu.

Dom je, sa 33 glasa ZA i jednim suzdržanim, usvojio zahtjev Vijeća ministara da se Prijedlog zakona o kretanju i boravku stranaca i azilu razmatra po skraćenom postupku, u skladu s članom 104. Poslovnika.

Ovim je iscrpljen dnevni red 29. sjednice.

Sastavni dio ovog zapisnika je transkript 29. sjednice.

Sjednica je s radom završila u 18,25 sati.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Mariofil Ljubić